



OTto natus est ex illustri familia Truckfelsio-
rum & baronū in Vualdburg anno 1513. Hu-
tus pater Vuilhelmus eum optimis præceptoribus
instituendum tradidit, atq; in bonarum literarum
studio eum educari curauit. Itaq; cum Otto felici
ingenio esset præditus, factum est ut æquales suos
in artium & linguarum studio facile superaret, atq;
in uirum doctissimum euaderet. Postea exteras na-
tiones uidit, atq; ob plurimas corporis & animi uir-
tutes proceribus hinc inde gratissimus extitit. In
primis uerò Carolus Imperator eum dilexit, atque
inter primarios amicos habuit. Hinc factum cum
Christopherus præsul Augustanus mortuus esset,
ut Otto communi Canonicorum consensu Augustanus Episcopus eligeretur,
Anno salutis 1543, ætatis uerò suæ tricesimo. Cum autem clerus, religione
Augustæ mutata, per sex annos urbe absuisset, inter alia Ottoni iniunctum,
ut indefesso studio uideret, quò clerus in urbem reduceretur, atq; amissa loca
recuperaret, id quod ipse gnauiter præstitit. In primis autem in Pauli; Roma-
ni pontificis familiaritatem peruenit, atq; ab eodem 19 Decemb. Anno 1544
Cardinalis Episcopus Albanēsis creatus fuit. Postea uerò ut Germaniam pa-
triam exornaret, Dillingæ suæ ditionis oppido nouam Academiam instituit,
atq; eam liberalibus stipendijs propositis uiris doctissimis exornauit. Præci-
puè uerò Iesuitarum ordinem dilexit, atq; eis docēdi munera ibidem commi-
sit. Quod si itaq; antiqui principes, qui hinc inde apud Germanos nouas Aca-
demias olim instituerunt, passim apud scriptores celebrantur, certè nec hic
Otto sua laude frustrandus, sed meritò posteritati commendandus erit, præ-
sertim cum plurimi eruditione & authoritate præclari uiri ex ea Academia
prodierint. In eo loco Otto princeps sæpius lectionibus interfuit, atque
in disputationibus publicis sua argumenta proposuit, & sua præsentia scho-
lam exornauit.